



大明會典卷之一百五十四


兵部三十七

武庫清吏司

郎中員外郎主事掌軍政武學及戎器儀仗辨其出入之數并諸雜行冗務

軍政一

國初重軍役嚴勾捕著在令典按大明令凡軍民以籍為定軍官頭目無得巧立名色徑行勾捉百姓充軍民戶亦不得詐稱各官軍人貼戶躲避差役果有在逃軍人在內申奉都督府在外申奉中書省明文方許勾取又按職掌凡各衛



所開報逃故并老疾勾丁代役軍人。先須查對鄉貫住址明白。具手本赴

內府給批。差人前去。著落有司官吏。逃軍根捉正身。如正身未獲。先將戶丁起解補役。仍根捉正身補替。其故軍勾取戶內壯丁補役。如別無壯丁。止有幼小兒男。取官吏保結回報。行移該衛照勘相同。紀錄候長成勾補。若送回老疾軍人。就留原籍住坐。將戶下壯丁起解替役。如勾無戶籍。或住址差拗。名姓不同。或係另籍民戶。及有戶絕無丁。有司體勘回申到部。行移該衛照

勘在營有無長幼人丁。并著落原管官旗務要挨究明白回報。定奪勾補。若衛所官吏。并老疾軍人。朦朧妄報。依律問罪。如原勾軍數不完。及勾到軍人。中途在逃。仍著落原差人員前去勾捉。若在外遷延違限。送法司問罪。是為定例。宣德初。申明畫一。正統以後。節年多所增損。改調編發。漸有變通。清理稽查。益加嚴密。事例甚詳。具列于後。其係職方所掌者。見職方司

根捕

軍士脫逃。例應根捉正身。拘戶丁補伍。舊典合

根捕勾補為一。今分類附載。凡係逃軍事例俱隸此

凡根捕逃軍。洪武二十二年。令各處逃軍。能擒獲一名者。賞鈔三十錠。隱藏出首者。二十錠。見在軍知而首者。十錠。為事充軍。逃回捕獲者。五錠。隱藏及轉送者。全家發金齒充軍。逃軍自首者。免罪復役。官吏不即起送。縱容害民者。處死。○宣德元年。奏准。凡逃軍三月不首者。并里鄰人等問罪。就點親鄰管解。富家發附近充軍。係軍籍者。發邊衛。能自首者。止罪。逃軍遞送隱藏

者。煙瘴衛分充軍。官司故縱者。論如律。○凡逃軍未獲。起解戶丁。若清冊未到之先。獲解而未至衛所者。仍選戶丁解查。未到即收補伍。候正身到日。釋放寧家。○凡逃軍不許以告狀為由。遷延生事。有應訴事情。令家人代理。若長解人中途侵損。訴告所在官司究治。仍速將逃軍接遞。○三年。奏准。凡軍逃還鄉。有詐死更名充吏卒僧道等項。及隱寄丁口。立戶他方者。并許自首改正。其詐稱名目。寄住影射。致原籍本衛兩無挨尋者。追獲自首。俱收寄本處衛所。他人告

發者。與窩家里鄰官吏人等。俱照例問罪。仍追本犯銀十兩充賞。○凡軍士全家逃竄里鄰知而容隱者。限半年首獲。過期事覺。軍發邊衛里鄰發附近充軍。○凡起解軍。多給家人文引。照身逃回者。限三箇月自首。違者。發邊衛充軍。仍勾戶丁補伍。里鄰及官吏論罪。○正統元年奏准。凡軍犯問招改捏名貫。候至編發脫逃。其後該衛查勾。無從根捉。又有假稱未到衛所。蒙

恩釋宥。或許諸衙門文書潛回鄉里。榜文至日。限兩月以裏自首。就發本處附近衛所充軍。原衛除伍。如限外不首。事發。犯人杖一百。連家小發煙瘴地面充軍。知情里鄰人等。發附近衛所充軍。官吏依律科斷。果係

恩宥人數。曾經勘明。給引寧家者。造冊繳部。○二年奏准。凡逃軍殘疾。并年六十以上者。收贖依親別選戶丁解補。如止有幼丁。照例紀錄。○凡逃軍軍丁解後復逃者。連妻小押赴原衛。如解人脫放。就發補本軍原伍。本軍得獲。發邊遠充軍。其軍丁已解。清冊後到者。取鄰里保明。行衛查勘。不必重解戶丁。○弘治十八年題准。清解在

逃幼軍。如或到衛脫逃。或當軍不及十年之上者。仍取戶丁再當一輩。年老方許開豁。○正德八年題准。凡里甲一人捉獲逃軍首官者。通免問罪。軍丁解發原衛應役。若軍丁出首者。里甲亦免問罪。若里甲鄰佑書手人等。敢有通同容情埋沒。照例問罪發遣。○又題准。凡遼東等衛所。經由山海者。行守關主事。嚴加盤詰。按月將經過解衛原逃戶丁。一一開揭。具由呈部。其居庸等關守備等官。一體遵照施行。○又題准。凡清軍御史。務嚴督各清軍官。將逃軍自正德八

年六月以前。如有在逃年遠軍人。許明白出首免罪。解發原衛補伍。若果遠年埋沒。不曾解伍。及行原衛所。原無名伍者。首挨得出。審的。方許申呈清軍御史定奪。○十年題准。凡軍戶全家躲避。遞年勾取。里鄰受財。明知不行。拏解者。正軍發邊遠里鄰發附近充軍。若近年逃移。丁產見存者。責併本管里長。從實開報。逃匿去處。取結在官。嚴限捉獲。起解。賣放者。照例問發。○十四年題准。凡逃軍先已解衛。改調別衛。後還原衛。兩閃作弊。俱是中途買捏。假印批迴。今後各

省并直隸府州縣類出造冊送清軍御史差人齎送各該清軍御史查報以杜姦弊○十五年令凡清出原逃正軍俱令原籍有司問罪軍解到部徑行發解通免送問○嘉靖四年題准凡司府州縣今後清出調衛復逃軍役行令遞解其通不到衛者照例問罪遞發該衛著伍即將前衛軍伍開除備申本部查考○十年題准凡各清軍御史委官清勾先將原逃問罪隨拘壯丁補伍緝事衙門巡城御史五城兵馬訪拏將妻雇倩軍人應點者從重治罪嚴限關津盤獲

逃軍如有軍士逃回里鄰戶首容隱以里鄰戶首押解里鄰戶首出首以的親父兄押解免僉解戶其三犯逃軍查究果有底業及月糧供丁不缺肆情逃避者以嘉靖十一年正月為始在逃三次從重照例擬罪若疾病失悞點聞及十分貧難不能自存者仍照常例○十一年題准凡鞫問逃回充軍人犯若係免死充軍者仍問死罪處決雜犯死罪以下充軍者務要審究次數明白除一次二次者發極邊衛分充軍三次以上者比照雜犯死罪准徒五年發邊方照徒

年限瞭哨滿日仍回原伍○三十年題准凡遇逃軍勾單到日務要嚴拏原逃正身起解若逃回之日果係病故及衰弱不堪驗明方許另選壯丁頂解若軍丁解補之後本犯得獲或被人首及自首者俱查照律例限期等項問遣○萬曆元年題准凡有軍在逃不分是否五百里內各衛所一面照舊填單送部一面徑報二司清軍道批府清軍官覈實轉呈清軍御史如無清軍御史呈接管巡按御史就近拘補俟部單到日如已解伍填簿繳單聽查未解則嚴限清勾

務在速補並不許各該衛所移文有司徑自勾提如違叅究

凡遇赦逃軍正德十五年題准凡遇

恩赦至日各衛所官將見在應放軍人查出開具招由連人解送就近法司叅詳給與釋放明文遞回原籍官司驗收當差若無法司明文遞回者里鄰人等即便拏送原籍官司查明准免逃回之罪仍解原衛其不該放免者仍照充軍逃回事例處決干礙軍職叅究○嘉靖三十一年題准凡新軍遇

恩赦給文放回。如無印信明文者，許里鄰人等掣送官司，以逃軍論。容聽者罪同。其有隨解隨逃者，仍將軍犯照依榜例問發充軍。縱本犯身故，亦解發子孫充當一輩。

勾補

軍士逃故等項，但缺伍者，例勾壯丁補役。幼丁紀錄幫丁聽繼，在營不缺者，不得重勾。應住勾者，不得妄勾。又有以恩恤開伍免勾者，具列于後。

凡勾補軍士，洪武二十四年，令垛集軍故戶止。

一丁者，勾有丁貼戶起解軍去原籍遠者，解京。該府遣人押送，若路順及與京師道里均者，從便解發。○三十五年定，垛集軍正軍貼戶造冊輪流更代，貼戶止一丁者免役。當軍之家免一丁差役。○宣德元年奏准，凡軍戶有丁而偽作無勾者，許改正免罪。仍扶捏回申者，軍發邊衛里鄰發附近充軍。○三年奏准，凡軍戶有充糧里老人，賄賂官吏及勾軍之人，朦朧保勘，或里老亦係軍戶，遞相欺隱者，並許改正。違者，正軍發原衛戶丁再罰一丁發附近充軍。○四年，令

凡應勾軍有賄買官吏。隱蔽壯丁。以家人女婿之類。冒名代解者。姦民私通軍士。招贅其戶。及過房典賣影射徭役者。並許改正歸宗。違者官吏坐罪。本犯全家調別衛充軍。代者就收補原伍。如果無壯丁。方許以少壯義子。及同籍女婿補役。○凡軍戶踈族及異姓人。舊為同籍分析後充軍者。止於有罪人戶下勾丁。若聞親屬充軍。妄為文憑作分戶在前。及祖孫父子異居。并在伍食糧年久者。不許。若同籍人生前各自充軍。有故。儘本房勾補。無則以他房三丁以上者補役。不及三丁者。以其本房丁盡事由。行本部開豁。○凡招募諸色人。係全戶充軍。有故。照名勾補者。先以一人解發。其實有戶丁申部議奏處分。○凡義男女婿。有代義父妻父之家為軍者。有故。止許於義父妻父之家勾取。如係戶絕。覈實開除。若自幼過房出贅各家。俱屬正軍。無丁者。以妻父義父之家為戶。絕還繼本宗。如本宗係民。仍補義父妻父軍役。其官員軍民之家。有家人義男女婿之類。自願投軍。或為事編發者。有故。止於其人本房勾補。本房已絕覈實

開除○凡逃軍每季或半年一類勾。死亡及殘疾者歲一類勾○正統元年奏准。凡抽丁塲集軍。先將私自輪替者。選壯丁連妻小解衛。果有老疾等項。方許替勾○成化十二年題准。凡挨無名籍軍士。同隸一府者。備造通知小冊。各州縣互相挨查解補。不許虛應故事。亦不許妄將平民擾害○弘治三年題准。今後軍戶丁絕。止有義男女壻。應該聽繼者。責令解補。若止是買產佃田承糧。不許一槩頂解。如里鄰人等。將軍丁詭作買產佃田。致混開豁。照例發遣○九年

題准。正軍犯該打點誑財等罪。充終身軍者。及犯人命強盜叛逆家屬真犯死罪。宥死永遠充軍者。俱在營有丁。就令補役。無丁者。原籍勾補。其止本身而遇赦回衛者。當軍戶丁。替出聽繼○凡充軍止終本身。除年遠累經赦宥。俱勘分豁。其天順八年正月以後。問發。但係在逃。或途中遇革。不曾經由所司釋放。輒自走回病故者。照例仍勾嫡男補當一輩。若在衛病故者。不許妄勾○十三年奏准。凡真犯死罪免死。并叛逆子孫及例該永遠充軍者。止在本房勾補。盡絕

即與分豁。其餘雜犯死罪。并徒流等罪。照例充軍。及口外為民者。俱止終本身。○十四年題准。各處遷來人戶。除原立民戶外。如原是軍戶。原籍無丁。差人給批關取。合照附籍軍戶事例。即與拘丁起解。毋得捏調不發。○正德六年題准。凡矜疑饒死充軍人犯。買囑脫免在家。及到衛在逃者。雖遇赦。不准免。仍拘戶丁解補。○七年題准。凡改調衛所軍丁缺伍。原籍清勾。查無名籍者。務要轉行原衛有司。逐一查報回勘定奪。不許輒便回稱戶絕。○凡清查軍伍。但有父祖

為事充軍。或典刑。全家發衛者。其子孫雖先已出贅。過繼。俱收併聽。繼遇缺挨次解補。○凡充軍人犯。除宣德十年正月以前問發。并近問永遠充軍者。俱照例勾補。其止終本身者。若在衛食糧差操。遇革方准釋放。如彼時在逃。曾經勾取者。免調。仍解原衛。逃回病故者。照例清勾。子孫一輩補伍。無子孫者。除豁。○十六年題准。凡宣德四年以前。逃故無勾軍名。照例住勾。以後除奉例開伍不勾外。其餘俱作清勾。三年一次造冊送部轉發。有司清理。其成化元年以後逃

故軍士。作照例實勾。一年一次。造冊送部。仍照本部原擬三分之數扣算。○嘉靖三十年題准。凡在京衛所逃軍。在職方司首補。領給印信。准令紙票。隨赴武庫司。明報掛號。查原衛所勾單。未發。立案。已發。行文原籍停止。每月終。手本過職方司查理。如有首補不報。姦軍。及在衛不自告補戶丁。查訪得出。或被人告發。一體治罪。○隆慶六年。令凡清軍御史。今後清出軍丁。除正軍外。仍於戶內另審。一殷實戶丁。聽繼。如有逃。亡。即勾聽繼之人。應補。若聽繼之人。別有逃。躲。則罪坐戶頭。捕獲原逃。免其補伍。仍併造入軍。由軍冊。以便稽查。○萬曆十二年。議准。行各省直巡撫。責令清軍官。將各衛所軍士。嚴查。每名務要繼丁。多者二三名。少者一二名。明註籍伍。聽繼。年終。造冊二本。一本留該衛所。一本送院。道查考。

道查考
凡勾軍違限。永樂十七年。令勾軍人違限半年以上者。充軍。○宣德元年。令凡勾軍人違限過一年者。許巡按按察司官。拏解赴京。問罪。違法情重者。不限年。○四年。令凡勾軍不許泛遣。孤

單無籍之徒。如違限二年以上者。官員追俸。旗軍選戶丁補伍。再限一年。以所勾軍赴京。違者。全家調別衛。其勾軍須填勘合。不許以關牒批帖。徑行有司。

凡禁止妄勾。宣德四年。令凡正軍在營有丁。不許於原籍勾取。如已行文。有司覈實回報。本衛以在營之丁收役。○正統元年。奏准。凡內外都司衛所。不許填給勘合。差人勾軍。止以遞年逃故等軍姓名貫址。造冊繳部。轉發御史。按籍清勾。○二年。議准。凡洪武年間為事。法司人犯病

故。其事內人犯。後斷發充軍。實差勾取軍丁。將前項病故人名。添入勘合。詐伊子孫財物。或因逃回。怪恨糧里拏獲。捏作一同。問發在逃。報衛坐勾。清軍官勘實。呈部開豁。其挾讎官軍。行衛依律問罪。○成化十二年。題准。凡軍丁解衛。即查缺收伍住勾。如有名貫不同。轉解本處清軍御史查審定奪。不許隨批帶回。如果本軍正餘不缺。照例發回聽繼。其原批開係查理者。仍聽查勘定奪。不許濫收。若捏故將軍士發回。隨復勾擾聽清軍御史究問。○弘治十六年。題准。清

軍文冊查出已逃而不勾未逃而妄勾并改易字畫而別勾就便責令改正將經該官吏人等照例參究○正德二年題准各該衛所多有將見在正餘軍一槩作缺發勾起解到衛官吏索罰紙錢即發回原籍聽繼清軍御史嚴加禁約各衛所敢有仍前違例妄勾軍士者年終類奏提問每百戶五名以上千戶十名以上指揮首領三十名以上者各問罪住俸一年不及數者照常問罪發落其有頻年勾擾者奏請降級調衛有司妄解者併治○嘉靖三年題准凡清軍

御史查有妄勾軍丁隨批帶回者即將該衛所官員指實參奏查照名數住俸降級該吏問罪革役枉法者從重發遣若見在軍人詐稱逃故妄勾戶丁索騙財物除將戶丁發回聽繼將本軍發缺人墩臺哨瞭三年滿日著役如或身故仍拘在戶兒男弟姪補役果無丁存方許發冊清勾○三十年題准凡在外衛所逃軍首復者本衛所即時申報本管上司移文原籍知會住勾在衛有丁者亦不許妄行原籍勾擾如不即申報并本管耽誤及在衛有丁致令原籍軍丁

解發索勒軍裝者官吏旗軍及在衛戶丁俱參
提究治○萬曆元年題准凡清軍御史務督清
軍官遵照先今事理將應解軍丁查與單冊相
同嚴行勾解其挨無名籍及丁盡戶絕經勘五
次以上及義男女婿與用價承買軍產人等不
得一槩混勾

凡分豁重勾宣德四年令凡逃軍調發及遠年
歇後發別衛者原籍又行勾補許覆勘開豁將
重勾戶丁寧家止聽補見役軍伍○又令凡有
告係民籍止與故軍名姓相同誤勾補役覆實

開豁仍查正軍應繼戶丁補伍若正軍戶絕覆
實開除其誤勾人已到衛食糧三年以上者不
准○正統二年議准凡軍丁於洪武年間或抽
丁或收集充附近衛所軍役因事問調別衛其
原衛勾取勘實除豁已收戶丁發回聽繼後調
衛所軍役○又令凡軍戶告有正軍及戶丁在
營不缺該衛止因軍丁發冊後解到重複勾擾
者清軍官行移該衛勘實免勾若軍缺伍及有
殘弱勾替者里鄰不行從實呈解俱論如律就
令里鄰人等勾解如正軍年壯及隱匿在營餘

丁一槩勾擾者照依榜例叅奏○又議准凡軍籍丁盡戶絕已經三次回申者即與除豁不許發冊重勾○弘治四年題准凡遇該造冊不該清勾者行各處清軍御史照兵部發冊行查果有保舉為官或遇例放免或例不勾丁或改調別衛相應住勾者開立前件各一樣二本解部以憑轉發該衛開除有司官員仍五年一次將住勾照前造冊解送司府類解本部轉發各衛以革再勾之弊○正德八年題准各清軍御史查為事改調遠衛軍人若只一軍調遣不係別

項充軍將近衛名籍開除仍行原衛不許重複勾擾其本房子孫并別房人丁盡造入冊聽繼所調衛分若原衛已奉住勾明文而故違復勾者清軍御史查究若係同祖軍役各房已調遠衛別房子孫畏懼遠軍私自願投當原衛者不准分豁候遠衛丁盡仍令近衛軍人聽繼○嘉靖三十年題准凡軍犯問該仍解原衛而軍丁先已解補本犯到衛之日該衛即將軍丁給文付本犯長解帶回聽繼其遞年發去勾單數內如有軍頭名貫充調來歷接補戶丁名字年月

相同者。不拘幾單。止照一單勾解一丁。凡開伍免勾。洪武二十三年。令生員應補軍役者。除豁。遣歸卒業。軍士借撥征進事故者。征進逃故軍男。年一二歲者。流民全戶充軍病故者。俱免勾丁。○二十七年。令武職充軍病故者。襲原職者開伍。○二十九年。令塲集軍有幼男在伍者。免勾丁。生員應起解者。送翰林院考試。成效者開伍。發回讀書。不成者。照舊補役。○永樂二年。令生勾軍有見任文武官及生員吏典等戶止三丁者。免勾。四丁以上者。勾一丁補伍。

○洪熙元年。令軍役丁盡戶絕者。具官吏結報。該衛轉行府部開豁。先為事充軍。後薦起為官者。不拘見任。致仕病故。俱免補伍。○宣德四年。令凡軍有征差等項。死亡不明。槩作逃移者。保勘開豁。其不知下落。經三次以上保明者。依故軍停勾。○凡僧道為事充軍故者。免勾丁。若故軍戶止一丁。在充軍之先為僧道者。覈實開除。在後者仍發充軍。○凡丁盡戶絕軍及山後人。查無名籍者。軍衛有司會勘造冊。繳部開豁。○正七年。令故軍戶止一丁。為見任官者開伍。○正

統二年議准。凡逃軍未獲。暫勾戶丁。發旁近寄操者。正犯到日。即與開除。○凡勾補軍丁在逃。解人發附近充軍者。事故免勾丁。○十三年。令挨無籍貫軍。經十次回申者。開豁。○天順八年。詔府軍前衛幼軍。今後如有事故。不必僉補。○成化十二年。題准。凡塚集軍。有陞官者。其貼戶停勾聽繼。遠年無勾軍。審究得實。行該衛查勘。不必起解戶丁。○十九年。令騰驤四衛軍士戶絕。不必勾丁。○二十三年。題准。為事充軍。止終本身者。果在衛身故。申繳本部開豁。若非征調在

外身故。未有本衛所相視明文。即係在逃。仍勾子孫一輩補伍。無者免補。○嘉靖二年。令各清軍官查審幼軍各祖。的係成化十七年以前。逃回病故者。給有印信明文。是實。別無違礙。即將名伍開除。免行解補。若逃回身故。事在成化十七年例後。不曾給有明文。但係曾當二輩在衛應役年久者。審勘的實。取具里老知因人等供結。亦照前例開豁免解。仍將開豁過名伍。奏繳兵部。以憑發衛一體開豁。其在衛見役者。本部照例施行。有情願應當者。止是自備盤纏。不許

幫貼○三年。令凡免死例。該永遠充軍。因犯。若未經發遣監故者。俱免勾補。其叛逆家屬。不用此例。○三十年題准。凡北直隸。山西。陝西。山東。河南。湖廣。四川等處。各巡按清軍御史。遇有原係府軍前衛。僉取侍衛。幼軍逃故。但在嘉靖三十年以前。曾當一二輩年久者。審實。取具供結。給免。事完造冊奏繳。仍造清冊二本。一本送部。一本行衛除名。以後再不許勾解。其三十年以後。見役不逃者。年久病故。照例開豁。其老疾無用。照例三年一次奏查。疎放。俱免勾補。如有逃回。係從來未及一輩者。亦不必勾丁。解衛務根。捉原軍著役。老疾故絕。亦免勾丁補伍。果係軍匠重役之家。亦聽免解。自願應當者。俱照例行。不許幫貼。在逃一體根捉。與老疾故絕者。俱勾解戶丁。如違。俱各叅提。從重究治。

編發

各處清出。在逃紀錄等項軍人。應解原衛者。累朝以來。或酌量南北。改編調衛。或暫收寄操。查明歸伍。其軍犯。又有就近充發。填實邊方之例。

今充軍定衛隸職方司

凡改編調衛。宣德三年奏准。凡紀錄軍。年應赴伍而衛所在千里之外者。許於附近收役。行原衛開伍。○正統元年奏准。凡浙江并江南直隸等衛所。清出帶操軍士。除原係廣西南丹奉議潯州等衛者。發回原伍。其餘悉收充正軍。行部轉行原衛開伍。若先在逃者。仍發原衛附近。不許擅收。○四年。令北人充南軍。南人充北軍。除遼東萬全山西陝西等處邊衛逃軍。及近年土豪鹽徒編發充軍不動外。其餘清出軍丁。各就地方交解附近衛分。若南人充南軍。北人充北

軍者。不在改調之例。

計改調衛所

原充兩廣雲貴四川湖廣福建邊海衛者

順天府調三萬衛

北直隸

大名府調定遼中衛

順德府調定遼左衛

廣平府調定遼右衛

河間府調鐵嶺衛

真定府調義州衛

保定府調瀋陽中衛

永平府調遼海衛

南直隸

鳳陽府調宣府左衛

揚州府調宣府前衛

淮安府調宣府右衛

廬州府調萬全左衛

徐州調萬全右衛

和州調永寧衛

滁州調保安衛

安慶府調隆慶左衛

山東布政司

濟南府調定遼前後二衛

兗州府調海州衛

萊州府調蓋州衛

登州府調復州衛

東昌府調廣寧衛

青州府調金州衛

原充遼東山西陝西寧夏等衛者

應天府調大興左衛

南直隸

太平府調義勇右衛

鎮江府調義勇前衛

蘇州府調武城中衛

常州府調燕山左衛

松江府調燕山右衛

徽州府調武城前衛

寧國府調武城後衛

池州府調神武左衛

廣德州調燕山右衛

廣西布政司

桂林府調潯州衛

柳州府調南丹衛

梧州府調馴象衛

潯州府調河池守禦千戶所

南寧府調慶遠衛

平樂府調向武守禦千戶所

慶遠府調南丹衛

太平府調柳州衛

田州府調柳州衛

思明府調武宣守禦千戶所

江州調慶遠衛

泗城州調懷集守禦千戶所

龍州調南丹衛

南丹州調向武守禦千戶所

廣東布政司

廣州府調南寧衛

惠州府調容縣守禦千戶所

肇慶府調武宣守禦千戶所

韶州府調鬱林守禦千戶所

南雄府調梧州守禦千戶所

瓊州府調灌陽守禦千戶所

潮州府調桂林中衛

雷州府調賀縣守禦千戶所

廉州府調柳州衛

高州府調桂林右衛

貴州布政司

思州思南鎮遠三府俱調赤水衛

石阡銅仁黎平三府俱調安莊衛

普安鎮寧永寧安順四州俱調興隆衛

雲南布政司

雲南府大理府俱調金齒衛

臨安府由靖軍民府俱調景東衛

楚雄澂江二府俱調蒙化衛

姚安鶴慶武定三軍民府俱調廣南衛

廣西廣南二府尋甸元江二軍民府俱調洱

海衛

金齒軍民指揮司麗江軍民府永寧孟定孟

良景東順寧五府俱調騰衝守禦千戶所

湖廣布政司

寶慶府調五開衛

辰州府調銅鼓衛

衡州府調九溪衛

永州府調鎮遠衛

靖州調五開衛

郴州調偏橋衛

常德府調豹韜衛

長沙府調龍虎衛

荊州府調鎮南衛

岳州府調龍江右衛

武昌府調行在府軍衛

黃州府調行在虎賁左衛

漢陽府調行在旗手衛

德安府調行在金吾前衛

襄陽府調行在燕山前衛

沔陽州調行在濟州衛

承天府調行在濟陽衛

江西布政司

贛州府調行在廉州衛

南安府調行在碣石衛

建昌府調行在和陽衛

撫州府調行在武德衛

袁州府調行在水軍左衛

吉安府調行在水軍右衛

廣信府調行在應天衛

九江府調行在羽林左衛

南昌府調行在羽林右衛

饒州府調行在府軍左衛

瑞州府調行在金吾後衛

南康府調行在府軍右衛

臨江府調通州衛

福建布政司

福州府調南海衛

邵武府調雷州衛

建寧府調潮州衛

延平府調海康守禦千戶所

興化府調靖海守禦千戶所

泉州府調龍川守禦千戶所

漳州府調廣海衛

汀州府調海門守禦千戶所

浙江布政司

温州府調鎮海衛

台州府調鎮東衛

處州府調平海衛

嚴州府調鷹揚衛

金華府調江陰衛

衢州府調橫海衛

寧波府調龍江左衛

杭州府調蔚州左衛

湖州府調神武後衛

嘉興府調神武中衛

紹興府調義勇中衛

四川布政司

成都府調會川衛

重慶府調寧番衛

順慶府調越雋衛

保寧府調建昌衛

敘州馬湖二府調鹽井衛

夔州府調建昌前衛

瀘州調鹽井衛

潼川州調迷易守禦千戶所

嘉定州調會川衛

雅州調寧番衛

龍州調建昌衛

眉州調建昌前衛

原充南方極邊衛分者

河南布政司

開封府調保安衛

河南府調萬全左衛

彰德府調開平衛

衛輝府調龍門衛

懷慶府調龍門守禦千戶所

汝寧府調懷來衛

南陽府調美峪守禦千戶所

山西布政司

太原府并沁州俱調太同右衛

平陽府調大同左衛

大同府調天城陽和二衛

澤州調大同前衛

沁州調高山衛

潞安府調大同後衛

遼州調安東中屯衛

陝西布政司

西安府調永昌山丹二衛

延安府調寧夏前衛

鳳翔府調涼州衛

鞏昌府調鎮番衛

平涼府調西寧衛

慶陽府調寧夏中衛

漢中府調莊浪衛

成化十二年題准。凡清出雲貴夷人。該解遼東等邊衛。并千里之外者。及事故官員人等遺下親屬寄住年遠。願補充無勾軍役者。俱免起解。編發本處邊衛。行移原衛開豁。若是土民坐勾。該解腹裏衛所。照舊起解。如有捏故避遠投近者。並聽拏問。仍解原衛著伍。○十三年奏准。凡收發附近軍士。除天順六年四月十九日以前編定不動外。以後告投者不許。其在附近處所逃者。依正統二年例。連妻小押解原衛。○又奏准。凡廣西隣近賊洞處所軍丁。有該解遼東等

衛。并千里之外者。及失迷鄉貫之人。願充無勾軍役者。俱編本處邊衛當軍。行移原伍開豁。○弘治三年議准。北直隸陝西山西河南山東人民。原充雲貴兩廣福建軍伍。係天順六年以後清出。未經解補者。聽清軍御史巡撫都御史督屬查明造冊繳部。係陝西者。編發甘肅延綏寧夏等處。係北直隸山東者。編發遼東等處。係河南山西者。編發大同宣府等處。各衛所差操。若在衛聞例。圖近逃回。事發枷號三箇月。改調煙瘴地面充軍。有司朦朧申報者。俱問擬枉法。○

九年題准。凡北直隸、陝西、山西、河南、山東人民。原充四川行都司、并湖廣五開銅鼓定遠等處軍役者。照依雲貴等五處事例。查編附近衛分。○十六年題准。凡清出該解軍士。照例徑解原衛。不許似前南北改編。致亂軍政。○正德八年題准。凡有清出遞年埋沒軍戶。久不到衛。近因清審得出。方纔得發原衛者。聽各清軍御史。斟酌處置。照依南北附近事例。改編。其餘若自洪武年間到今。充發各衛所著伍已定。及有戶丁節年解補聽繼。別無埋沒情弊。俱各照舊解補。

○九年題准。凡軍人在正德九年正月二十八日以前逃故。該衛所見。今造冊清勾。及在詔書到後三箇月以裏。赴本處合干衙門首告者。方許改編附近。若原造軍戶迷失衛所。及例前清出解衛。查無名籍。發回聽候者。亦准改編附近。若聞有

恩赦。方纔逃回。及衛所有人。應當不曾開除。并在三箇月限外。首告者。俱不准改編。若原衛所相離原籍。不及千里之上者。亦不准改編。其生長北方。祖充極南衛所軍役。或生長南方。祖充極北

衛所軍役合於前例。相應改編者。俱編本處沿邊衛所。行文於原衛所開除。不許編在腹裏。以致邊衛缺軍。若有朦朧投告各

王府護衛儀衛司。希圖改編。及軍衛有司官吏。徇私作弊者。照正德元年事例。軍人枷號三箇月。改調煙瘴地面充軍。經該官吏俱坐以枉法重罪。○嘉靖二年題准。凡逃軍自首。并紀錄單丁出幼者。許改附近。不出二三百里之外。埋沒作絕清出者。俱照舊例。南人改北。北人改南。如仍作巧犯法。重治發遣。○十一年題准。凡在京衛

分軍人。但有原無產業。隨解隨逃。其原籍查係陝西州縣者。行移清軍御史。出給告示。曉諭聽其情願。改編本省附近衛分。如臨鞏地方。改隸河西衛分。平鳳地方。改隸固原蘭靖衛分。西安延慶地方。改隸延寧衛分。山西河南地方。有願改前項邊衛者。一體改隸邊衛收籍。仍造冊送本部發各該衛分。開豁原伍。永不許妄行清勾。○二十二年議准。山西一省。應解別省軍士。除兩京宣大遼東陝西。照舊清解外。其餘清出。應解河南山東四川湖廣浙江江西福建兩廣雲

南等處軍俱存留本省。撥附近衛所收籍食糧。其各省應該清解山西者亦不必解發。就改彼處衛所充軍。宣大各鎮俱照例行。事完各該巡撫都御史將存留軍人姓名備造文冊二本。一本奏繳。一本送部。轉發衛所開豁原伍。以後不許勾擾。○三十一年題准。凡清出軍士若係嘉靖三十年四月二十五日以前逃亡者許其改編。以後逃亡者即係捏故希改。清出軍戶或原逃仍補原衛不許改編。○三十二年題准。軍犯節次改編。貽累軍丁勞及解戶通行十三省及

南北直隸各巡按清軍御史查照。以後清理軍丁俱不許比例改編。永為遵守。○隆慶五年議准。山東山西河南北直隸江北六處清軍御史清出軍丁不論原隸何省何衛俱改發薊鎮聽總督軍門定與衛分。○又議准。行山西陝西清軍御史如遇清出二省軍丁果係該省衛所額軍不拘邊方腹裏仍發本衛。若係各處衛所額軍俱改發薊鎮。其起解軍人照舊拘妻僉解。○又議准。甘肅固原寧夏延綏大同宣府遼東及山西偏老寧鴈等處均係極邊重鎮。清出軍士

應解前項重鎮者。仍解原鎮。其應解腹裏并南方各省者。盡數改發薊鎮。聽總督軍門移咨兵部。轉行原衛除豁。不許重勾。○萬曆元年題准。凡新充終身軍伍。改編及充發薊鎮軍士。立限赴部掛號。以憑查考。類行入冊。及將改編軍士。行原衛開除名伍。免一軍二役之弊。○四年題准。將廣東廣西。見奉單勾。應解外省軍丁。并兩廣互相充發。途出千里之外者。在萬曆四年四月以前逃者。通行清出。會同巡撫衙門。酌編本省各衛所充伍。行文各該衛所。開豁原伍。其以

後逃者。務盡本法清勾。不得援此為例。

凡附近寄操。正統二年議准。凡逃軍自首。及紀錄出幼者。或未曾紀錄。戶無人丁者。俱發附近衛所收操。開豁原伍。○又議准。凡宣德五年以後逃軍。及勾取戶丁。妄比事例。輒投附近寄操者。俱收發原伍。○成化十二年題准。凡清出雲廣福建極邊衛。分遠年無勾軍士。或自首。或被入首者。行查原衛。果無名籍。發附近食糧寄操。若來歷明白。仍解原衛。○弘治二年議准。兩廣瘴癘地方。不時用兵。本處軍人。熟知鄉導。服習

水土。將先前寄操復解原衛者。照舊存留。○十三年奏准。凡各處解到新軍。查無名籍。及來歷姓名差拗者。俱暫收缺軍所分食糧差操。行查至日。另為定奪。○正德八年題准。凡紀錄軍丁。有年方出幼。戶無人丁者。暫准收發附近衛所食糧差操。分豁原伍。待戶內丁壯。照舊改正。若有壯丁者。不准。

凡就近充發。宣德五年。令應充軍之人。有父母年七十以上。及篤廢殘疾者。許於附近衛所收役。○嘉靖二年題准。編發新軍。各從南北。有該

極邊字樣。方發極邊。如無極字者。遠不過三千里。程限不過一二月。○十二年題准。行貴州巡撫都御史。凡遇勾補三次逃軍。及為事改發。問發邊衛充軍者。酌量地方遠近。俱發本省沿邊都勻普安。烏撒。永寧。畢節等處衛所充軍。應該極邊衛分者。調發前項沿邊衛分哨堡。常川守哨。永不更番休息。例應止終本身者。待其身終。子孫仍補原衛。中間有重大罪犯。留置本省。恐貽他患者。仍照舊例發遣。○十三年題准。通行陝西。山西。山東。河南。北直隸各巡撫官。凡有該

發邊衛充軍人犯。俱定發甘肅各衛充軍。○二十年題准。凡遇送到軍犯。俱南人發南。北人發北。自二千里以上。至三千里而止。程限不過二三月。如情輕罪重可矜者。邊衛酌擬本省地方。邊遠酌擬隔省地方。如該極邊者。俱照嘉靖七年例。北直隸。宣大。山西。河南。山東人。俱發甘肅。除北直隸。山東外。或俱發遼東。仍咨各撫按定擬軍犯。一體斟酌。除情重者外。邊衛擬于本省。邊遠擬于隔省。極邊擬于再隔省。如該邊衛而省內無邊方者。擬於隔省附近邊方。其邊遠

極邊。依類遞配。○隆慶五年議准。各省巡撫官今後新充軍犯。應發邊衛者。盡發薊鎮。其由兵部定衛者。一體于薊鎮查發。○萬曆元年題准。凡新充終身軍伍。須分附近邊方。極邊三等。附近。則就近各省。邊方與極邊。南人則盡數編發南方。其有南人係北方衛所。調衛軍士。與南人占籍北方者。亦一體編發薊鎮。不在南人就南之例。○九年題准。通行順天。河南。陝西。山東。山西等處。撫按衙門。各將應問充發陝西。宣大等處。邊遠。并三犯逃軍。不拘久近。俱編發遼東。填

實錦義寧前衛所○十一年題准。全陝軍犯。就近編發甘肅填實明海三灣草溝大營等堡。仍於金城關設立盤詰。禁止逃回。

大明會典卷之一百五十四

大明會典卷之一百五十五

兵部三十八

軍政二

起解

清勾充發軍士。應起解者。皆拘妻僉解。津給軍裝盤纏。先年又有解軍行糧軍丁口糧恩例。備載于後。

凡起解軍丁。宣德元年奏准。凡起解逃軍戶丁。須量地立限遞解。若長解縱容。違限半年以上者。依律問罪。一年以上者。發附近充軍。犯人發邊遠充軍。○正統元年奏准。凡起解軍先過該

管都司者。即於本司交割。先過本衛者。交本衛。官吏隨與批迴。有留難者。從御史究問。批迴詐偽者。有司辨驗問罪。○又奏准。凡被勾貧軍。挈家流移。招回復業者。該解軍丁。俱候次年起發。係原逃者。不准。如止附近潛躲者。依律究問。○二年議准。凡軍人中途病故。解人即告所在官司相埋官。給文引。付解人。送妻小復還原籍。別選壯丁解補。○天順元年奏准。凡被災去處。除逃軍照例起解。其軍丁。著令里老保領聽其生理。待秋成後起解。若係流離新復逃軍。亦待秋

成之後。軍丁待一年之後起補。每年該造清冊。各另開報。○四年。令京軍及邊衛逃軍。仍解兵部。撥防軍轉遞。其餘及邊衛勾解戶丁。徑送該衛交割。○弘治四年議准。凡軍解正身。并攬解之人。買求衙門。私造印信。私用批迴者。事發解人不分親身代替。俱發近衛軍人。發邊衛。原邊衛者。發極邊。各充軍。其盜使印信。私造之人。自依常律科斷。起解之時。仍於批內刊印前情。使人明知遵守。其各清理軍政官。解軍之後。獲有批迴者。類造揭帖。開送清軍御史處收候。類於

春秋二季。移文知會各省清軍御史。某軍某年
月日解某衛所。獲有批收。是否真批。曾否在衛。
彼處清軍御史。行查的實。然後回文。若不曾到
衛者。即拘軍解里老究治。從重解發。彼此互相
查考。○十三年奏准。凡各處清解軍士。選揀精
壯親丁。僉點相應長解。批內明開相貌年甲。在
京者。起解兩京兵部。在外者。徑解該衛。若不係
同宗子孫。頂替起解。及將長解正身。賣放在家。
執批前來。雇人頂名者。正軍問調別衛。頂軍就
收本衛。長解并受雇之人。及里老鄰佑。知情不

首者。俱發附近各充軍。○凡起解軍士。捏買偽
印批迴者。除真犯死罪外。解人發附近軍士。調
邊衛各充軍。○又題准。各州縣清出軍士。先行
開申司府。係原逃正身。限一箇月。以裏補役。戶
丁限兩箇月。即行起解。司府倒文註銷。責限查
考批迴。清軍御史。吊取每次清軍實有事故底
冊。并批迴號簿。查對比併。若有限外不行起解
及起解一年之外。不獲批迴者。就將各該官員
量軍數多寡參問。仍將軍士。責限解完。掣取批
迴。各司府於年例造報兵部冊內。仍開各軍起

解年月日期。以備稽考。○凡衛所遇各處解到
逃軍。并補役軍丁。該見缺收伍者。出給印信收
管。該原批帶回者。備由出給印信批單。付與解
人。於司府州縣。各投一紙備照。若出給收管批
單。不及張數。及用印模糊。因而指索軍解。許被
害人赴所在上司陳告。司府州縣清軍官。遇有
軍解銷批。務要查驗明白。若止於原批批迴。而
無收管批單。及印信模糊。或墨蓋硃者。俱不准
銷繳。○凡清出。并捉獲。及自首復業。逃移軍丁。
自成化元年以前。未曾解衛者。大率人丁二丁。
解軍一名。如果軍多丁少。候有丁起解。若戶下
丁多隱匿。及將近年逃移。捏作遠年者。事發應
解軍丁。發邊遠。自首復業者。有司存恤。待次年
起解。里鄰人等。侵逼在逃。就令抵充軍役。待獲
解衛替放。○又題准。凡應解軍丁。除真犯死罪
外。若犯監守常人竊盜。拘摸搶奪。至徒罪以上
者。牢固釘解。該衛收伍。轉發守哨。年限滿日。著
役。其犯別項徒罪以上。俱止杖一百。解發著役。
○又題准。凡在京五軍都督府。選差官舍押解
充軍犯人。受財賣放。犯該枉法絞罪者。官發立

功滿日還職。調衛帶俸差操。中間又犯姦淫囚犯婦女者。守哨滿日。革職為民。舍人發邊衛充軍。徒罪以下。及無賊者。官發立功。一年滿日還職。帶俸差操。舍人抵充軍役。候拏獲替放。若酷害軍犯。按檢財物者。縱不脫放。亦照前充軍立功事例施行。其該府原選差掌印首領官吏。參究治罪。○又題准。京衛及在外衛所。解到新軍。以投文日為始。限十日內。將收管批迴。給付長解。若刁蹬留難者。該吏軍吏總小旗提問。衛所掌印并本管官。不拘曾否得財。參問帶俸差操。

○又題准。解到新軍。查編軍冊。戶口食糧冊。與批同者。就收補役。係別衛差解。查勘改正補伍。不許推調不收。以致延脫。起解軍丁。不許將見在衛所軍戶。捏解查理無勾別軍。以圖算作分數。及將原係邊衛。捏作附近。朦朧解補。違者。官吏人等。在京從部。在外從清軍御史參問。○正德七年題准。凡有新發充軍。長解人等。受財脫放。及違限者。比照違限一年事例。亦發附近衛所充軍。○十年題准。凡有司差人解軍。務審里甲。有丁力者。編作上中下三等。置立印信文簿。

在官遇解。酌量遠近。分等僉點。若容私挪移。從清軍御史叅問。○十五年題准。凡軍衛有司。如遇上司發下同起充發同衛軍人二名以上。僉點長解管解各軍。俱要摘出招由抄寫。各另給批分投押解。不許同批。違者官吏問罪。○嘉靖元年題准。凡問發充軍人犯。及應調邊衛逃軍。俱限三箇月以裏盡數起解。中間有追贓不完者。止拏本犯的親男。年十五歲以上者監追。如無親男。仍留本犯監并。亦限三箇月以裏責令變賣家產。完報起解。責取批迴。不許展轉捏故。致誤起解。亦不許將同居弟姪。及義男。冒作親男混監。如違。該吏坐以贓罪。首領官提問。掌印官住俸。本犯會赦不宥。○四年題准。凡軍民有犯。例該充軍等屬。有司者。有司僉解。屬軍衛者。軍衛僉解。不許偏累有司。違者叅究。○十六年題准。凡應解軍士。責差的當人役。起解各衛所地方。先赴彼處清軍巡按衙門掛號。然後投衛。該衛查有號印。方許收役。其各該府州縣。亦必查有號印。方許掣批。其清軍御史巡歷去處。仍將各衛解到新軍。比對字號查照。如或逃數多。

量行罰治。若係隸解兵部者。徑自赴部投文。轉發各衛所。不必掛號。以致煩擾。○十九年題准。司府州縣。清解京操補伍軍丁。務要揀選精壯親丁。批內明開年甲相貌。責差相應長解赴部。審實發營補伍。若有在京遊食之徒。頂替代當。該衛指揮等官。扶同作弊。縱令正軍逃回者。一體緝訪。照例叅送。治以重罪。○二十四年題准。起解充發軍犯。比照清勾起解事例。將各里甲編作上中下三等。挨次輪流押解。○三十一年題准。凡司府州縣。問發軍犯。詳允。即便嚴限起

解。毋得延捱。仍查近例。係永遠者。審註本犯子孫的實名貫事產。抄招各省申布政司。直隸申各府。登記文簿。係終身者。戶丁事產。另記一簿。軍犯送該都司起解。○三十二年題准。解補軍人。須從府縣起給批文。赴布政司倒換。解發該衛所收管著伍。直待其人老疾。方許告替更代。不許執信私約。十年五年。輪房私自更替。如有私替者。照先年山西等處。抽丁等軍。私輪替換事例。從重問斷。其官旗若有縱容收替者。比縱容軍人歇役律例叅究。○三十八年題准。各省

并各直隸巡按御史嚴行所屬。凡係問擬終身
永遠充軍人犯。招案明白者。不候追贓。先行發
遣。務要酌量道里遠近。拘僉真正妻小。定限押
發原定邊腹衛所。依期責併批收銷照。造冊繳
部。各衛所縱容冒替潛逃者。許各撫按指名查
叅。○隆慶五年題准。巡按御史務申飭各州縣
凡遇清解軍士。即量地遠近。立限比併批廻。詳
辨真偽。仍將起解過軍士。并獲收批廻月日。各
造一冊。各衛所亦將解到軍士。并給批月日。各
造一冊。俱候年終送清軍衙門查對。如州縣開

有批廻。衛所不開解到。年月日不相投。即係詐
偽。與違限一年之上者。解人發附近軍人發邊
遠充軍。○又題准。凡巡按御史務令所屬清軍
官。今後起解軍丁。照條例於各里丁力上戶。分
立第等。酌量僉點押解。不得獨累本里本戶。若
路出二千里外。孤苦不能起解。給文關支口糧。
若先曾起解。又行逃歸。照例止連妻小鎖解原
衛所補伍。收管遞繳。不許復僉長解。其解到軍
人。衛所即給收管批廻。不許刁難。違者聽清軍
官徑自究治。

凡僉解軍妻。正統元年奏准。凡解軍丁逃軍。須連妻小同解。違者問罪。無妻小者解本身。○正德六年題准。凡批內開有妻。而無解到者。即於收管內。開妻無解到。銷繳批文之日。原籍官司。驗有中途事故明文。長解免究。若無。即將長解問罪。仍追妻給批。責令親屬伴送。給軍完聚。敢有託以無妻。將長解指勒者。將掌印僉書等官。參奏提問。○萬曆二年題准。解到新軍內。有雇覓假妻者。審出。將妻變價入官。或配與別衛無妻軍人。

凡軍裝盤纏。宣德四年。令每軍一名。優免原籍戶丁差役。若在營餘丁。亦免一丁差使。令其供給軍士盤纏。○成化十三年奏准。起解軍除子孫應繼者。令津貼軍裝。但有職役者。不許勒取。○弘治十年題准。各清軍御史。督行所司。將軍戶。除在逃發冊清勾軍士。照例挨拏清解外。其不奉冊勾之家。以五年為率。著令戶下應繼人丁。給供送批文。於戶內量丁。追與盤纏。照數開寫批內。仍差管解該衛。當官給與本軍收領。取本衛印信結領黏批。迴繳。若本軍在彼富足。不

願供送者聽其告免。如營中故絕無人。就將應繼人丁收補。如原籍未有妻室。聽就彼婚娶。有妻在籍者。就於結領內備開妻室氏名年歲。著令原籍親屬送去完聚。亦取回照。若軍家富足。自願不時供送盤纏者。聽從其便。○正德十五年題准。凡在京在邊輪操軍士。有一家二名以上。班次相同者。許令一名改撥別班。無礙操軍。改撥本班。庶使軍裝易辦。往回互得休息。○隆慶五年議准。凡州縣清出應解之軍。責令本戶。或本里。照依丁糧幫貼軍裝盤費。其長解工食。

一體幫貼。沿途路米。雖千五百里之外。不准關支。○六年議准。凡清軍御史。務督有司。清解軍人。審定田產。酌為供幫常數。填入由帖。嚴令戶丁。以時齎送。或聽本軍回籍類收。不許有缺。凡解軍行糧。宣德元年令。凡起解自首并補役軍丁。出一千五百里之外者。經過有司。每人日給行糧一升。過期不與。不首逃軍。及腹裏衛分不及千五百里者。不在此例。凡軍丁口糧。正德八年題准。凡有司起解遠軍。千里外者。查例另給關文一道。關行所在官司。

給與軍丁口糧。若至七八千里遠者從寬添給。妻小口糧。關內亦就開寫明白。以備查照。倘軍丁病故。告驗明白者。妻小仍給口糧回籍。

清理

國家承平以來。軍士多逃亡。故絕。及脫漏隱蔽。行伍益耗。乃遣御史分行天下。清理軍役。各司府州縣。仍設清軍官。以修廢行賞罰。事例甚繁。具載于後。其軍民奏訴事情。清軍官得聽理。亦附載焉。

凡清理軍伍。宣德四年。令在京各衛軍。兵部委

官同給事中御史清理。○正統元年。奏准。清軍御史。按行所至。司府州縣。各委官一員。將應勾軍丁。分投清解。御史往來巡督。除軍政外。一應詞訟。發該管衙門問理。每歲八月終。照巡撫官事例。具清解過軍數回京。如有窒礙事理。會議奏請。○成化三年。題准。兩京原差存恤給事中。御史部屬官。每年終。吊查糧冊。如有買閒等弊。依律參究。仍將查過軍數具奏。其查對糧冊。止於兩京兵部取數。不必拘各衛所官比較。若見役與糧冊不對者。照刷卷事例。行拘各衛首領。

官吏查問。在外衛所。照例行巡。按御史。公同按察司分巡官。并直隸知府。每三年一次清查。○七年題准。差委清軍官。先清衛所。後清有司。彼此互查。分豁回報。事完。各造冊二本。奏繳。一送兵科。一送兵部。清理之後。新有逃亡。事故者。各取衛所呈報。依例行該。有司作急。清解完卷。或五年。或七年一次清理。本部申明舉行。○八年。令在京軍。每三年一清理。各營軍士。仍分豁差遣等項名目。造冊備照。○十三年奏准。凡各官舍餘。各清軍御史。嚴查清審。存留幫軍。分撥差

操。若隱瞞不報者。許諸人首告。指揮千百戶。有受財包占。私役辦納。月糧者。聽清軍御史參奏。拏問。○又奏准。凡清理逃故等項軍士。各清軍御史。著落都司。定委軍政都指揮一員。衛所委軍政佐貳。指揮千百戶各一員。專職其事。務要盡數清出。造冊送部。冊後附寫當該官吏。并清軍委官姓名。以備查考。○弘治九年題准。凡有司審出軍戶。十五年以上。無衛冊勾者。造冊差人轉發。各該衛所。從實註報。若果挨無。具由解部定奪。不許收發附近。以開弊端。衛所填冊。敢

有將見在捏作逃故。實有捏作挨無指揮每三名以上。千戶每二名以上。百戶每一名。各罰俸一箇月。首領官員經歷照指揮。知事照千戶。吏目照百戶。一體罰俸。若容情受囑。故意改捏。指實參奏。治以枉法贓罪。該吏無分故失。先行提問。○十六年題准。凡挨無名籍軍役。曾經一二次勘明者。行各有司類造通知冊一本。繳報類發各衛所查照開豁。若衛籍止是差訛。雖稱挨無。務要嚴督里老人等。照舊清理。若容私捏報。就將里書提問。代補軍役。○十七年題准。不

奉清勾軍役。俱先類衛造冊。發去填註。轉繳前來。如果註開缺伍。然後拘丁。若有司開寫衛分欠真。衛所填註名伍不實。及清軍官朦朧將丁差解。查理者。該管上司各治以罪。○正德元年題准。今後有司各將清解過軍人。并妻小。及解人姓名。起程日期。類衛造小冊一本。入遞徑送清軍御史處交割。出巡將冊內軍數。逐一開審。曾否解衛。其衛所曾否存恤。有無賣放剝削。若在逃數多。參究衛所。不曾解到。參究有司。○十年題准。凡軍戶年久無勾。作見當全家在營作

丁盡戶存戶絕者。類衛行勘。取具印信回文。填註手冊在官查考。若捏作見當。其實脫伍者。解補。如原籍遺有產業。無人承種。聽本營餘丁。一。二。回籍承種幫繼。以後十年一次復查。若有欺隱。遲回。聽清軍御史參究。○又題准。凡充軍人戶。或一家八九名。或十四五名。數多子孫畏懼。多有巧於脫避者。清軍御史務督清軍官將。逐年抄劄充軍人。備查某年曾有宥免。事理應否。開豁。徑自施行。其不曾宥免。應該勾解者。如軍役數多。解補不敷。勘實奏請定奪。○十一年題

准。清出遇例。或為事改調軍伍。曾經起解。獲有批收可據者。免其查理。若係遠年失據者。在本省衛分。每衛類造小冊一本。備開改調來歷。送本處清軍御史。發衛查填。隔別遠衛者。比照十五年不奉冊勾事例。每衛類造一本。送隔省清軍御史。發衛填註。如後調衛分。有人應當者。免其解補。若係曾經到衛逃回者。俱要解丁補伍。若自調衛之後。一向埋沒者。務究作弊之人。照例從重問擬。調近衛者。仍解原充遠衛。調遠衛者。不得復原衛。○十六年題准。凡軍調衛五年

之上。而原衛又發冊清勾類等數起。給文差人前去改調衛分清軍御史處查理。如果缺伍。仍拏本犯發原調衛分。另拘戶丁補充原衛名伍。○凡有司造到回答冊內。開稱丁盡戶絕無勾等項。須行令衛所備填原伍有無遺下餘丁。及發冊次數。繳部通類奏准。應開豁者開豁。應住勾者住勾。○嘉靖元年題准。各布政司并直隸府縣。遇有兵部編發軍犯。逐一開具充軍招由造冊奏繳。本部置立簿籍。分第內外衛所。逐一附記硃語鄉貫并畧節招由。一年一次。行查原籍衙門。曾否解獲批廻。仍一面行移問發衛分。查取著伍日期。以憑查銷。其有遇宥赦應免。及止終本身者。亦照備開合干上司批申釋放緣由。申部查考。仍咨南京兵部。將節年編發畧節緣由一體咨報。○十一年題准。清軍御史定例五年一差。但以完銷五年內發去軍單。畢日許令回道。不必定以三年為限。○又題准。凡清理軍士。照兵部發去軍單。逐一清審。內有丁者。即與解送著伍。遇例優免。及該免勾者。即與開豁。年終造冊。連單送布政司。及直隸該管府州。差

的當人員送部銷照。若將有勾軍丁自單到日為始。三年以上不解者。雖止一名。府州縣清軍官俱參問。丁盡戶絕。并山後人氏。挨無者。照例候經勘五次以上。送清軍御史審實類繳。免其再勾。兵部及該司府州縣。仍各立住勾冊。每衛一本。以備查照。老幼不堪解者。候經勘三次以上。造冊送部案候。原單留該州縣。候出幼解衛及老疾故絕日繳。逃移根捉者。候三年不獲。該州縣另冊編記。將原單繳部。行該衛所另給單勾。如再三年不獲。仍照此例施行。里甲人等。通同作弊。捏作故絕。幼小老疾逃移者。事發應解軍丁。照例發邊遠充軍。如原係邊遠發煙瘴極邊。仍令僉戶下一丁補伍。里甲鄰佑窩家人等。各照例發附近充軍。官吏依律坐罪。○十七年題准。各處清軍御史。行所屬問刑衙門。凡有問發充軍者。仍行充發衛所。并都司知會。各立文簿一扇。將解到軍犯。隨即對錄。行衛所食糧。與額設軍士。一體差遣。按季將見在。并逃故數目。申報清軍御史查考。有逃者。即行原籍挨拏。務獲。照例問罪。○三十一年題准。凡布按清軍道。

直隸府州縣。但遇發到軍單。不拘有無清軍御史。務要嚴行所屬。隨即清解。置立循環文簿。按季查比。如宣德至弘治年間。事故軍士。果係結勘數多。別無隱弊者。方准呈送巡按清軍御史覈實。立住勾冊繳單。其單許照格眼挨年填註。一年雖審數番。止許開結一次。仍將節年清勘過緣由。如某單於某年月日。作何清駁。里鄰人等作何結勘。開立卷宗。候清軍刷卷御史清刷。如無成案可查。及有扶捏情弊。朦朧繳單者。從重問遣。自正德元年以後。軍士雖稱事故。年代

未久。該州縣另冊編記。原單繳部再清。不許一

槩除豁。○隆慶四年題准。在京衛所造送勾單到部。弔戶部食糧文冊。查對無冒糧情弊。方發清勾。戶部放糧。亦弔兵部勾軍底簿。查係見在者。方准領糧。如清單已發。即投首者。縱係正身。亦違律限。職方司不許收補。若既准投首。在逃者。已復營伍。原役不缺。武庫司速行住勾。仍置立簿籍。將清勾住勾。及復役頂補。解到名數。各照本管逐一開造。每季終呈堂類查。如遇解到新軍。即行收伍。不許原逃軍人。妄稱在營。故占

名糧捐勒解到戶丁。如違坐贓治罪。○萬曆元年題准。凡清軍御史直隸責兵備道。各省責清軍道。置實收實除簿各一扇。遇有解到軍丁。或軍犯。即將申解來歷。招由畧節。及人丁事產填註實收簿內。隨行該衛著伍。遇有申報逃故。或選退釋放正軍。即將事故年月日期填註實際簿內。隨行該衛扣糧。應勾者造單發勾。應豁者造單釋豁。衛所不得妄勾。姦軍不得抽減。

凡清查寄籍。景泰元年。令官軍戶下多餘人丁。有例除存留幫貼正軍外。其餘俱許於附近有司寄籍。納糧當差。若一家有三五人十餘人。止用一二人寄籍有司。而將餘人隱蔽在家者。不分年歲久近。除該納糧草。仍於有司上納。其人丁盡數發回軍衛。○成化十二年題准。調衛戶下餘丁。寄籍有司者。若遠調二三千之外。後調衛所。正餘不缺。聽留一丁。於有司種辦糧差。其餘悉收原衛所操守。如後調衛所缺人。行原衛餘丁內取解。不許於原籍勾擾。其調衛在千里之內者。餘丁照例回營。○弘治九年題准。洪武以來附籍造報軍戶。迷失衛分。未經解補幫

貼者就於附近缺軍百戶下收補。若明有衛分
曾經查解幫貼。見在軍役不缺者。行查明白免
解。若係軍捏報民戶。及冒認他人名伍。影射祖
軍。計圖日後避遠就近者。自首免罪。亦發附近
充軍。○十六年題准。凡官軍舍餘。不許於附近
有司寄籍。清軍官盡數查出。每衛所造冊一本。
差人送各衛所。造入戶口冊內。令其常川在營
差撥。若寄籍年久。該徵糧草數多。量留一二丁
在有司辦納。在營所生兒男。除已納粟濟邊充
承差吏典知印外。以後參充規脫軍伍。衛所申

呈本處清軍巡按處。查提問罪。寄籍人丁。責限
解衛守取收管繳照。若原先寄籍。不係在營所
生。止許行文查勘。著令在彼聽繼幫貼。○嘉靖
元年題准。凡一應流移寄籍之人。或致仕閒住
官吏人等。新占籍者。但有縱軍為民。及隱蔽冒
認等弊。該府州縣查出。呈送清軍御史覆勘。是
實。嚴限差人押發原衛著伍。○又題准。凡各軍
餘丁。及軍籍民生。由學校出身。不拘科貢等項。
一應寄籍隔省。及本省州縣。脫軍為民。影射戶
籍者。除本身已故。量留一二丁。仍照例附籍看

守墳墓。見在者。不拘年月久近。人戶多寡。一體查明。解發原衛所著伍當差。如有翫法不服軍衛有司拘審勾解。及軍衛有司互相容隱者。清軍御史提問參奏。

凡清軍專管。正統二年議准。凡兩司府州縣清軍官專一清理軍伍。毋干預他事。○弘治四年題准。凡布按二司清軍官。照分巡分守事例。依期巡歷。若隨出隨回者。聽各該御史照例住俸參奏。○九年題准。凡逃故軍士文冊。兵部推舉年深主事一員。陞武庫清吏司員外郎。撥與本

司吏二名。專一清冊。若係署職。該實授。不得遷

轉別司。

後員外郎缺。仍選主事。

○正德七年題准。凡事非

緊急軍情。擅將清軍官員差委及所屬阿順營

幹者。悉聽清軍御史參奏。○十年題准。軍籍吏

典。不得撥武庫司冊科當該。軍籍監生。不得撥

送清軍。南京後湖查冊監生人等。并司府州縣

兵房吏典。造冊書手。俱不許用軍戶之人。○十

三年題准。布按清軍委官。每季將清過軍數。開

報清軍御史查考。如有推姦避事。輕則朝覲之

年會同考察。重則參奏提問。署印進表。經由撫

按會委其餘常事不許改委○嘉靖三年題准守巡官帶領清軍年終改道吏書因之作弊今後仍令右布政使并年深副使照依舊規出巡專一清軍○凡清冊監生比照清匠事例俱作實歷事完照例轉送吏部上選該支俸糧就於本部關支○三十年題准凡各清軍官陞遷改調等項務要將領過軍單解過軍數逐一查明方許離任違者聽清軍御史叅拏究治凡清軍賞罰成化十一年題准凡清軍以十分為率能清三分以上不枉平民者御史及兩司

官兵部奏請獎擢府州縣官量加俸級不及數并枉人者御史從都察院考察兩司官兵部叅奏府州縣行吏部黜責○十四年題准清軍御史巡按御史今後查理勘合以十分為率一分不完者委官住俸二分不完者經該官員住俸該吏與委官提問住俸五品以上并軍職照例奏請通行責令完報方許關支俸糧○弘治十七年題准凡清軍委官清出不及三分布按二司官住俸三箇月府州縣官住俸三箇月不及一分布按二司官住俸三箇月府州縣官并各

司府州縣承行吏典提問。照例發落。灾傷地方。暫免參罰。清軍御史曠職怠事。一體參究。○正德十六年題准。守巡官員帶管清軍。每年春二月。秋九月中出巡。七月十二月終回司。都司并直隸各府委官。俱照此例。若果各官勤能聽各該清軍御史奏保。如出入自由。即係不職。指實參究。○嘉靖三十二年題准。凡清軍官員。如遇三六年考滿。將任內清過軍士。取獲批收若干。未獲若干。奉到原發勾單若干。未繳若干。完銷勘合若干。其內外經歷知事等官。亦將任內收

掌軍冊卷案。造送軍單等件。總計若干。通行攢造方冊。類送吏部。轉咨兵部查考。如有曠廢職業。及營謀別差。無益軍政者。不准給由。○隆慶五年題准。凡布按二司清軍官。各分定屬府一半。照依分巡分守事例。按月巡歷。其府州縣正官。督同佐貳官。同心清理。如有未及分數者。聽清軍御史指名參奏。比照錢糧未完事例。遞加罰治。雖經行取陞遷。不許離任。其清理有法者。分別獎薦。○六年。令府州縣掌印清軍官。完軍八分以上者薦。七分以下者獎。六分以下者戒。

飭五分以下者參降。營衛官員無分將領千把總。不善撫卹。致有逃亡者。二分以下者附過。三分以下者降一級。五分以下者降二級。每年終。各兵備道呈報督撫衙門。會同具奏。○萬曆十二年議准。各撫按責成三司府州縣衛所各清軍官。專供本職。嚴行清勾。其任滿給由。將造完清勾文冊。徑送兵部查考。如無部冊。移文吏部。不准給由。撫按官仍每年將各官清勾數目。備開一揭送部。武庫司主事一員專管收查。本部分別未完多寡。於年終類參。

凡軍民奏訴。正統二年議准。凡軍丁有訴告民籍。及分戶在前冒解者。俱暫發該衛收役。行移州縣勘實。軍改為民。原清里老。依律問罪。若是妄告。就行本衛。如法究治。○凡妄指遠年民籍作軍戶者。諸司不許准理。○凡清出軍丁起解。除父母妻子人命重情。許自訴外。其餘悉聽戶丁告理。違者釘解。○弘治十三年題准。凡軍丁奏訴冤枉。除解衛食糧。及三年之上行勘。不准詞內不開原清官職者不行外。其餘但係近年清出。不問有無批解。照例暫發該衛收役。如親

屬抱訴。即將親屬遞回。挨催本軍解衛。一體暫收奏詞。兵部行移清軍御史分豁。原清里書人等。依律科斷。若挾讎誣執。就發抵充軍役。本軍改正。如有不實。就被依律問罪。原係軍丁出名。亦行該衛如法究治。

冊單

事產戶籍附

國初令衛所有司。各造軍冊。遇有逃故等項。按籍勾解。其後編造有式。齎送有限。有戶口冊。有收軍冊。有清勾冊。近年編造四冊。曰軍黃。曰兜底。曰類衛。曰類姓。其勾軍。另給軍單。法例益密矣。

今備載而事產戶籍附焉

凡編造冊單。洪武二十一年。令各衛所。將逃故軍。編成圖冊。送本部照名行取。不許差人。各府州縣類造軍戶文冊。遇有勾丁。按籍起解。○成化十年題准。凡衛所編造軍冊。每年限五月。以裏差有職役人員送部。違者照官軍馬贏文冊例罰米。當該官吏論日住俸問罪。若造冊三分不完者。官罰俸一月。該吏提問。如官吏依限發冊。而所差人自違悞者。止坐本人。○十一年題准。各處清軍御史。及兵部委官督各衛所。將原

管旗軍不分見在逃故。備開充軍改調來歷。并節次補役姓名。每布政司。每直隸府。攢造一處。各一樣二本送部。一本存留備照。一本送御史查對。如稱某衛充軍。而某衛冊內無本軍名伍者。解部定奪。或發附近衛所收操。以後遇發到清勾文冊。只將前冊查對清理。○又令各處清軍御史。將兵部發去各衛所造報旗軍文冊。對查軍民二冊。以防欺隱。其冊。府州縣各謄一本備照。○十五年題准。凡各衛所造冊清勾逃故等項軍士。務令本衛軍政指揮及首領官。先將該勾名貫。照洪武等年間軍冊查對相同。造成小冊。連洪武等年軍冊。印封齎送清軍御史。查對無異。方許造冊繳部。在京錦衣等衛。并五府屬衛。聽本衛掌印指揮查對。在外若係停止清軍御史。聽巡按御史查對。若衛所造冊官吏人等作弊。該勾軍士名貫查對不同。先將該衛首領官吏。并該管總旗。及造冊軍吏。就彼問擬發落。指揮千百戶等官。俱住俸責限查理。重複清造。其繳部文冊。務開稱何年月日。經由清軍或巡按。及本衛軍政官查對相同緣由。印封繳部。

以憑轉發清勾。違者在京從兵部參究。在外行
巡按及清軍御史提問。○弘治四年題准。今後
清出十五年以上。不奉冊清勾軍戶。每衛所造
冊一本。每名畧節開註來歷。印封差人。係在京
衛所者。送兵部。係南京者。送南京兵部。係南北
直隸。并各都司所屬者。送各該清軍御史。對名
查勘。其在衛者。填註本軍來歷。并節補見後姓
名。缺伍者。填註逃故年月。俱限十日。以裏。印封
繳部。責付差人領回。行屬清解。仍限每三年一
次行查。以省煩擾。○九年題准。凡各處巡撫都

御史。督同守巡官。行令所屬衛所。每季將發到
軍數。及見在事故。申達合干上司知會。仍不時
差官點閱。或行查訪。仍行各處撫按清軍巡鹽
衙門。司府州縣。各將問發軍犯名貫畧節。招由
編過衛分。起程日期。年終類造具奏繳部。其在
外都司。并直隸衛所。照例每年終將收過軍數
造冊申繳。若是過期。兵部奏行巡按御史。將掌
印官住俸一箇月。責限造報。○十三年奏准。凡
遇問刑衙門。解到軍犯。務將招由鄉貫。并著役
日期。寫立印信文簿。每年終將收過軍數。開造

小冊四本。一本送部。一本送撫按清軍官。出巡稽考。刷卷逐一照刷。若本管官員賣放。查例處治。曾經逃回者。遇

恩例不准釋放。○又題准。南京後湖管冊官。將洪武至今軍黃冊籍備開年分。每省造成總冊一本。立案交代。解到軍役。若查冊人回稱泥爛。務弔前造總冊查驗。各處司官清軍官。亦將冊籍如法造成總冊。明立文案。遇有陞任事故。憑此交代。遺失責令抄補。方許起送。州縣攢造黃冊。改軍作民。及析戶不明。填名來歷不真者。察訪查

對得出。作弊人犯。治以重罪。其補役軍丁。務要查冊有名起解。敢有詭名者。事發將戶長發附近。另充軍役。○凡軍衛造報戶口文冊。以弘治十五年為始。每五年一次。不分官軍。照例將祖貫充發。改調陞除始末。及戶口明白開報。每衛於一千戶所後。每守禦所於百戶所後。明開先於某年月日造報。及今某年月日重造。如違。駁回另造。先將該吏提問。軍政掌印。并委官各住俸。解報批迴。方許關支。○正德六年題准。凡造格眼圖冊。每一軍戶。限以兩行。每行十格。每格

十年。備填各軍貫址。充調來歷。子孫支派。上自
洪武十四年起。至正德七年止。用堅白紙造完。
一本送部。司府州縣各存一本。備照。待後十年
攢造之時。兩行填滿。益以三行。不許挨退。遠年
格眼。○七年題准。攢造軍冊。專委軍政僉書一
員管造。掌印首領官。查對無差。送部轉發清勾。
若每衛造差五十名以上。所造差十名以上者。
將經該官照例送問。衛差百名。所差二十名以
上者。軍職送問。畢日。仍革去僉書。不許管軍管
事。首領官咨吏部。通考罷黜。該吏軍吏人等有

贓罪。問發為民。調衛。若衛差五十名以下。所差
十名以下者。各罰俸兩箇月。衛二十名。所差五名
以下者。各罰俸一箇月。俱免送問。差錯許改正。
○十年題准。凡攢造逃故軍冊。務備開來歷。限
三月以裏。送清軍御史處。分發布按清軍官查
對。若有差錯漏造者。照常改造。衛所指揮千百
戶。并都司各掌印清軍官員。各量所轄逃故軍
士名數。以十分為率。差錯漏造三分者。指揮等
官。革去管事。都司官員。比照違限事例。罰俸一
箇月。該吏提問。若分數不及。照常施行。○十四

年題准。各司府州清軍文冊。一樣二本。到部定限七月以裏對完。一本存照。一本轉發司府州。其冊仍類填給勘合。交付公差。并新選職官。順齎前去交割。合用船隻車輛馬匹脚力。并廩給口糧。俱照例應付。不許陸續給發。○十六年題准。凡各府清軍官。照依原定冊籍。攢造黃冊。嚴督州縣掌印官。分析明白。毋得脫軍擾民。捏稱丁盡戶絕。次年該造格眼軍冊。除有見在編軍魚鱗類姓等冊查算外。果有冊籍不存。開具戶籍都圖里分。申呈上司。取冊查算。若司府州縣

冊籍蕩絕者。方許申呈兵部。揭查冊籍。劄行回照。○凡各司府將清解過軍丁。獲有批收者。類造開註小冊。每布政司。每直隸府。各一樣二本。其兩京各衛各都司。將所屬衛所解到軍丁。及出給批收年月。類造小冊。分別司府亦一樣二本。俱付各該進表官齎送兵部。一本存照。一本同取到京衛給過批收冊封固。移咨都察院。給付各進表官領送。各清軍御史。將獲到軍解批收。與冊比對。同者准作到衛。不同者。即係詐偽。行提軍解將軍丁問罪。差人遞解原衛著伍。○

凡勾軍冊式。以成化元年以前原額及陸續收充為舊管。以後至該年終收充為新收。改調住勾為開除。食糧差操為實在。見今該勾逃故為清勾。分別屯所。攢造花名總冊。仍以該年分該勾軍士名貫充調接補來歷。逃故年月日期。分別有司衙門。攢造底發冊二本。并花名總冊。送部查收轉發清解。○嘉靖元年題准。凡各司府回答勾軍文冊。照軍衛文冊例。限次年五月到部。違限者照例究問。○二年。令都司衛所將應勾軍人。備查原充改調貼戶女戶的祖姓名來

歷節補逃亡年月。衛所官旗都圖里社坊隅關廂保鎮鄉團村莊店圈屯營等項的確。逐一造冊呈報兵部轉發。其各司府州縣清軍官。凡遇冊到。將所清軍黃冊籍磨對相同。行拘原逃正身。或應繼人丁。備開妻解年貌。并充調來歷。填給批申。各該官員仍嚴督吏書。於所造清冊所給批申。俱用堅紙大字。以便查對。若將緊關字樣。增減洗改。審有扶同。俱依受財枉法及誣告充軍律例科繼。○三年題准。凡清軍冊預分司府封記本數。候各處進表官員事畢。責令齎回。

若日期在前。遇有公差回還。告討脚力者。就便
搭配公文。責令帶領。係各省者。布政司交割。係
南北直隸府州者。該府州交割。○十年題准。凡
造送總會軍冊。務要將各軍戶祖名充調接補
來歷。子孫枝派。盡行查明。各州縣開造軍數大
總。各坊都圖開造軍數小總。各軍戶下分別收
除實在數目。冊後俱要開寫承委官吏職名。每
里下開寫里書姓名。另造委官職名小冊。通行
如法裝釘印記。差委的當人員。依限解部。各司
府州縣。仍各存一本備照。○十一年題准。清勾

軍士。除宣德四年以前題准住勾外。以後該勾
逃故軍士。聽兵部定與軍單式樣。照式刊刷。每
軍一名。填單一張。用印鈐記。隸兵部者。徑送隸
都司者。類送兵部掛號。轉發各司府州縣。照名
清勾。司府州仍造底冊一本。送部存照。以後止
將本年逃故軍士。造冊填單。送部施行。兵部年
終。將各州縣逃故軍單總數。類填勘合催勾。仍
先照式造軍總文冊。送部存照。○又題准。凡齎
領軍冊人員。移咨吏部。每季於新陞除司府官
及州縣正官。每布政司。選委一人。直隸各照巡

按地方選委一人。開送過部。將該季所有冊單。盡數給與順帶前去各省。送布政司。直隸送巡按御史交割。轉發清理。○又題准。凡各司府州縣。如遇兵部發到各衛所軍總文冊。務要置立木櫃。整齊收貯。各官去任之日。俱要交代明白。如有踈虞接管官具申清軍御史。具呈都察院。移咨兵部參究。其齎送冊單人員。如有違限損失等項。俱照例送問。○又題准。凡各衛所依式攢造軍總文冊。并清勾軍單。在京衛所。仍限本年五月以裏。南京直隸。山東。山西。河南。限本年

六月以裏。浙江。江西。湖廣。福建。限本年七月以裏。四川。兩廣。雲貴。限本年九月以裏。俱到部。各都司掌印官員。務要嚴行催督。如有違限不到。各都司官。與各衛官。一體從重參究。以後年分。該造軍冊。仍照舊例。五月以裏到部。○三十年。題准。凡軍士逃故。各衛所造單。照舊備造冊底三本。一本送清軍御史。二本隨批文連單徑送兵部。將底冊一本。兵部轉送五軍都督府知會。須清軍御史掛號。以防稽遲。雖隸都司者。離遠不便。亦照此例。其無逃故軍士者。各申呈清軍

御史年終類呈都察院咨送兵部查照。兵部發出勾單亦令領齎人員送清軍御史轉發所屬清勾。如有違悞聽清軍御史查究。如停差清軍御史行巡按御史○又題准凡各省司府州縣都司衛所每年終各備造文冊一本布政司及直隸府州造者各開解過軍丁有無取獲批迴數目年月日期都司及直隸衛所造者各開收過軍丁給發批迴年月日期如司府冊內有起解而衛所無起解到者即行根查原解人問擬仍速解著伍其司府冊內有批收而衛所冊無解到者亦行查解丁捏偽若係妄勾則罪坐衛所官吏其冊俱限年終到部若有違限即照違限總會軍冊參問○又題准凡各巡按清軍御史事完之日開造冊籍具奏其冊行本部存照者分衛共為大冊一本或二本行部轉發各該衛所者每衛各造小冊一本以便分發俱要查對無誤印鈐連原單類繳其各衛所於冊到之後即查照住勾如有妄勾行清軍或巡按御史指實參提依律問擬○又題准凡各巡按清軍御史一體行令所屬置立號簿如遇發到軍單

須逐名抄寫。後留前件。即發領回。遇有清解過軍士。隨時登記。季終查比。催督按單清解。有通同埋沒等弊。軍發邊衛充軍。吏書人等。各發附近充軍。○三十一年題准。凡問發軍犯。務審真正名籍。都圖里社。不許捏稱趙三。即錢五之類。一經詳允。即便抄招。將本犯戶丁事產。逐一審實。行移司府登記冊籍。年終類造文冊。呈送撫按奏繳。其解軍批申。亦要摘緊要招由。明開永遠終身實註年貌人丁事產印鈐。各衛所登記冊籍。每遇大造之年。盡數查明。造入舊軍之後。

毋得隱漏取罪。○又題准。凡大造之年。除軍黃總冊。照舊攢造外。又造兜底一冊。細開各軍名貫充。調來歷接補戶丁。務將歷年軍冊底查對明白。毋得脫漏差錯。又別造類姓一冊。不拘都圖衛所。但係同姓者。摘出類編。又別造類衛一冊。以各衛隸各省。以各都隸各衛。務在編類詳明。不許混亂。其節年問發永遠新軍。亦要附入各冊。前葉先查槩縣軍戶總數。以遞合圖。以圖合都。以都合縣。不許戶存戶絕。有無勾單。務尋節年故牘。補足前數。每於造冊之年。另造一次。

有增無減。有收無除。每縣每冊。各造一樣四本。三本存各司府州縣。一本送兵部備照。冊高闊各止一尺二寸。不許寬大。以致吏書作弊。○又題准。凡司府州縣及各衛所奉發到軍單。查係宣德四年以後。弘治十八年以前。逃故軍士。在營無丁。原籍又丁盡戶絕。及挨無名籍者。經勘五次以上。然後准送清軍御史。審實照見行軍單格式。每單用紙一葉。刷印格眼。前開原單來歷。次開結勘緣由。又開里書姓名。每衛類集一處。隸本省者。徑行住勾。各省者。差人齎送清軍御史。轉發查照住勾。仍將住勾過緣由。并該管職名。責令併開單內。移文回照。轉行州縣。給帖該圖里老執照。各州縣亦將住勾軍戶。另造數葉於軍冊之首。以備稽查。各清軍御史。事完造冊奏繳。青冊一本。同原單送部。與本省住勾冊一體存照。若正德嘉靖以來。雖經勘五次以上。根拘未獲。清勾未明者。該州縣另冊編記。原單繳部。行該衛另給單勾。如再三年無從根捕。仍照例行。○隆慶三年題准。新選官不許告領軍單。希求勘合。如本司積有軍單。類付車駕司發

撫按差來奏本人役。各照省分。順齎回還。清軍衙門交割。量添包馬一匹。應付。將領到軍單數目。并承差姓名。填註號簿。候清軍衙門回文到日。付司。以便稽查。○五年題准。凡巡按御史。務令所屬州縣。將兜底類姓類衛格眼冊。依期攢造。冊前仍揭原額若干。新收若干。某年查明住勾若干。見今清勾若干。務要總撒相投。字無謬落。類送兵部。通將洪武以來舊冊互查。中間如有以越稱吳。以錢易趙。及埋沒欺隱等弊。聽本部從重參究。○六年。令凡攢造軍冊。務照兵部

節題事理。并發去格式。除祖戶名。不許擅為更易外。其餘戶丁。審據的確正名。照例分立新收。開除實在。仍於實在項下。另立二款。一曰見役。下係軍丁某人。二曰聽繼。下係軍丁某人。其餘去本身者。務要開收之數相當。以備勾解。○凡清軍有司。務將應清軍丁。及充發永遠軍人。查審詳明。每解軍一起。即造為一冊。將本軍丁產貫址。及所定衛分。俱開寫在內。以便查考。以後每遇大造黃冊之年。總造送部。名曰軍籍文冊。其各軍由帖。亦十年一次更給。○凡各清軍御

史務督所屬清軍官將見年均徭冊內人丁。審
係軍戶者。摘入軍黃冊內。仍將祖軍名籍充調
衛分接補來歷填造民黃。及均徭冊內。貫串歸
一。不許隱漏壯丁。其堯底三冊一體查同登造
○凡各清軍御史。今後造軍黃堯底等冊。務照
節題式樣。總開於前。撒附於後。縣開縣總。各都
之撒。必合一縣之總。都開都總。各社之撒。必合
一都之總。社開社總。各軍之撒。必合一社之總。
在類衛冊。則各衛之撒。必合一縣之總。各軍之
撒。必合一衛之總。在類姓冊。則各姓之撒。必合
一縣之總。各軍之撒。必合一姓之總。仍要逐名
查對。備開充調接補來歷戶丁枝派。不許一軍
重造兩軍。兩軍合併為一。違者重究。駁回改造

○凡清軍御史。將軍黃冊。行各該委官。親自檢
查。如有差謫。即行駁造。如經歷司道駁回者。府
自造。不得復累州縣。經部駁回者。司道自造。不
得復累府。違者聽各該撫按官參究。○凡各府
州縣。將新舊軍民等冊。明註全缺。計紙印鈐。其
攢造新冊。除送部外。若存留司府州縣者。通送
清軍御史。首尾印鈐。發回貯庫。仍置簿一扇。將

各項冊籍備開某年某冊幾本計紙若干張登記明白照前送印發回收貯巡按清軍御史出巡逐一查驗若有損失罪坐典守之人冊籍即行補緝○凡造新勾單務查的確貫址充調接補來歷送部覈實發清不許將遠年逃故軍士朦朧混造到部者查明立案其曾經奉例改調各清軍官速查明備造冊類送各清軍御史覈實候差滿之日造冊送部轉行各清軍兵備道弔取各該衛所軍冊查照除豁如有占愆不與除豁復行勾擾者聽御史指名參究○凡清軍

御史督令有司衛所清出軍人即照兵部發去由式將本軍合戶人丁地產并軍繼軍裝填寫由內印鈐給付本軍收照到邊之日督撫官定有衛分該道一併填註以便稽考○萬曆元年題准凡清軍御史務查先今議定冊式照常攢造四冊以備考覈如式另造簡明清冊以便稽查其式仍照原題寬廣各一尺二寸每板縱橫各三格其上格大書軍伍姓名註寫充發解補來歷中格註開戶產軍裝軍丁下格空之待填冊後十年事故下輪攢造則以下格事故歸併

上格之末。仍空下格以待後填。其間或改調分
豁者。揭名類開冊前。不必填格。陸續發補者。照
名序填冊後。四冊照舊解部。簡明清冊。止存本
省。不必解部。

凡事產戶籍。成化十五年題准。凡造冊之時。遇
有軍戶。俱要明開全家在營。逃移未獲等項。行
款。存戶在冊。其田產止令見在里鄰佃辦。諸人
不許收買。以免日久告爭難查之弊。違者。田土
追給軍戶。不追用過價錢。若果在營。原籍丁俱
故絕。曾經查勘文移明白。方可開除。毋得將有

丁消乏軍戶。貪分田產。淆亂版籍。○又題准。凡
各衛所如遇解到軍丁。即將本軍舊有遺房遺
地。著令親管官旗。盡數退還住種。若有仍前受
銀。將軍丁脫放。并將原占各旗軍下餘丁房產
不還者。許人告舉治罪。○正德七年題准。凡各
衛所有官軍旗校人等陞調。并充軍調衛等項。
不分久近。但有留遺戶丁。寄住原衛所。守祖墳
房者。俱明白造入原衛所戶口冊內。聽繼軍役。
不許欺害脫漏。若有置買民田。亦止許將一人
屬有司寄莊。其軍衛有司官吏人等。敢有指以

寄莊為名。因而脫軍作民。致亂版籍。事發一體重罪。○八年題准。凡有逃絕軍人田土。賣絕年久者。不許告爭。若見今拋荒。及分撥十排里甲佃種。陪納糧差累人。民間人戶。有情願繼本軍名役告佃者。備行該府州縣清軍官。督令各該里甲人等查勘。委是本處淨民。不係逃移遠軍。方許承佃。本人仍發原充衛分當軍。不許改易近衛。以啓弊端。若本軍逃回。挨拏得獲。仍補原伍。田歸本軍管業。其佃田頂軍之人。取回仍作民戶當差。○嘉靖三十二年題准。各軍人原祖有田產者。給付當軍人役收租。老疾更換。隨軍退吐。其無產之軍。俱於本房人丁。每年津貼。不得爭奪負累。以滋弊端。

禁令

累朝清軍禁例。已隨類分載各條。其難於附屬者。具載此。

凡軍人罪犯。宣德三年奏准。凡山西等處抽丁等軍。有賄賂官吏。將幼弱私自輪替者。許原籍究補。同伍指陳。本軍并事內作弊之人。依律論罪。○凡囚充及調衛軍。問招更調。有更易名貫。

隱匿丁口者。其後逃故。衛所行勾。有司回無名籍。似此迷失者。並許自首免罪。若他人發覺。軍調煙瘴衛分。仍選戶丁補充原伍。○四年。令凡應繼壯丁。故自傷殘肢體者。許鄰里拏首。全家發煙瘴衛所充軍。○正統元年。奏准。凡逃軍及已解軍。在家潛住者。父祖充軍。子孫畏繼。於別州縣過繼作贅。冒籍。而以丁盡戶絕。回申。或充軍在役。而原戶人私開作民戶者。並限兩箇月。具首免罪。如違。軍杖一百。發煙瘴衛分。里鄰窩家長解人等。發附近充軍。○凡勾軍人潛回原

籍糧里容留者。照窩藏逃軍例問發。○又奏准。凡清軍御史。按屬地方。有軍衛官。害軍士。指實具奏。其有司官吏里鄰長解人等。將逃軍。并應繼已解各軍丁。容私埋沒。及戶有壯丁。却將老幼殘疾家人義男等項頂解。并挾讎。故將同姓同名冒頂陷害。並依軍政條例發落。○弘治三年。議准。凡改調軍役。止是一軍充調。曾經五次回申。存有案卷者。回報兵部定奪。若所司經該官吏。將一戶二軍。捏作一軍。朦朧回報開伍者。事發坐以贓罪。○十三年。奏准。凡官軍軍丁。

有將戶內弟姪子孫。過房與人。或官豪勢要。和買改易姓名者。不分久近。許其贖取歸宗。聽繼無得占愴。其誘買各邊軍丁者。發極邊充軍。○正德十年題准。凡有軍戶通同里書。及官旗人等。隱瞞壯丁。故將幼丁紀錄。躲避軍役者。許自首免罪。如不自首事發。屬有司者。比照逃軍榜例問斷。屬軍衛調邊衛。官旗從重叅問。○十五年題准。凡曾經為事充軍。用計營討各邊外省。劄付。冒納偽填軍職。散官義民等官。在家者。許原籍官司拏問追奪。犯在例前者。照充發逃回例問擬。若犯在例後。除真犯死罪外。其餘枷號滿日。發煙瘴地面。永遠充軍。若劄付有偽。問擬詐假官律。○嘉靖三十二年題准。凡清出逃移軍丁三名以上。及全家投託官豪勢要。藏躲連年缺伍者。戶長問發邊衛充軍。戶丁仍補原役。其窩家若明知軍丁。用強包占二名以上。為奴佃者。及恃勢抗違。拘勾占愴不發。照窩藏逃軍榜例。發附近。若係軍人。發邊衛。俱充軍。如戶內止有一二丁。因貧難以自活。依託人家雇工。以資衣食。及窩藏非勢要用強。并不知情者。仍照

常發落

凡管軍官違犯。正統元年奏准。凡內外衛所官。有將殷實軍。占作軍伴。賣放買間。新勾軍不行存恤。抑逼在逃者。軍士事故。管軍官不將在營人丁收補。及以見役軍妄作事故者。清軍官具奏提問。○弘治十三年題准。凡各處備倭貼守。其把總等官。縱容舍餘人等代替正軍者。正軍問調沿海衛分舍餘人等。就收該衛充軍。把總等官。參問治罪。○又題准。凡在京在外衛所官員。有逼迫軍士在逃。及賣放回還者。指揮每十

名以上。降一級。千戶鎮撫。每六名以上。百戶四名以上。依律遞降。○正德十年題准。凡在京在外衛所官員。有將殷實軍人。占作軍伴。冒支月糧。賣放回家。作取討衣鞋名色。里鄰人等挨拏送官。清軍御史。具奏拏問。有賊者降調。○又題准。凡管軍官員。不許將正軍指稱取討盤纏。及拘拏逃軍。給文賣放回家。各州縣清軍官。務省令軍籍之家。以時量送衣裝。若有正軍指稱前項名色回家。許里鄰人等。捉送所在官司問罪。本管官旗聽。清軍御史參問降調。○十四年題

准。凡各邊將領把總及各衛所大小官員除報探緊急聲息軍情外。其餘止許在間舍人餘丁內委差。不許指以公差為由。私給批文。縱容正軍回籍延住。違者。即係賣放。依律問罪。照例降級。○十六年題准。凡各營衛遇有逃操等項官員旗軍。各該管官隨時具呈本營提督及該衛掌印官處治。量情責打發落。限外不獲者。各另具奏。拐有馬匹者。務追究還官。不許指以倒馬開豁。各衛每季將各所在逃軍人名數。開送兵部。年終查考。每月但逃軍至十二名以上。兵部

查奏。該管軍官送問。不及數者戒飭。其有一年之內。並無逃軍者。量加犒勞。遇缺陞用。其各坐營官本營但有逃官軍。并倒拐馬匹。數目多寡。亦聽本部查奏。罰治。○嘉靖十年題准。凡各清軍御史。通行各都司。轉行衛所。不許擅差軍人。執批勾攝軍士。亦不許縱容包當賣放。如違許所在官司。不分真偽。連人批徑解清軍御史。具招參奏。官問降級。軍調邊衛。舍餘人等。問發附近充軍。○三十一年題准。軍職有犯倚勢役占。并受財賣放餘丁。多至三十名以上。致地方

防守荒廢者俱照軍職賣放正軍甚者事例發
邊衛充軍

大明會典卷之一百五十五

